

四庫全書

集部

欽定四庫全書

集部
定字集卷十四

詳校官中書臣賈鉸

侍讀臣孫球覆勘

總校官編修臣王燕緒

校對官修撰臣吳錫齡

謄錄監生臣楊其梓

欽定四庫全書

定宇集卷十四

元 陳櫟 撰

考評 祭文 祝文

明經書院文會考評

考場屋之文易評課會之文難鵠袍戰藝不持寸鐵各
專席舍一影無儔寸晷風簷忙無善步失而失耳莫知
其所以失司衡鑑者出大府公差秉青銅鏡持玉界尺
以黜陟多士多士倉猝應試高者信有之其不能記憶

不得要領不善摘繪者往往十人而九考者且數十人
有初考有覆考有主文衆智互叅優劣易見落卷試者
不得見賢者不怨勝已不肖亦不能尤人夫奚難今以
文會友何書不可閱何師友不可資旬鍛月磨大肆厥
辭考評之責強諉之一夫且病者力孱懼壓膽薄懼譏
與童生吾伊來客頽印餘閒蓋無幾合經疑經義以卷
計者三百五十若之何能以一夫之目盡之況司盟司
糾名卿老儒尤未易出手小有謬誤出惟衆口難齊寧

不負茲隆委乎辭之不獲窮日夜洗眇昏讀之沒川采
珠鑿石求玉憂憂乎其難哉初讀賦既懼繼續讀諸經義
又懼何懼也懼無以塞責也最後讀諸經疑不覺驚喜
過望焉炤乘連城頓獲三數恨賞不足酬之耳嗟夫此
豈場屋寸晷之所能為哉何當刊之書肆可為天下作
經疑者之式既以自賀且為同會獲歷觀之益賀而尤
為司盟司糾二公賀云

燕山八景賦考評

燕山八景之名其昉于何時何人乎以瓊島太液二名觀之想起于中統以後黃氏賦所謂因內海以為池即瓊島而為圓者是也名出何人未之能詳意其倣瀟湘東陽鳳翔古虔等處而標此名京師衆大之區凡山川疆域宮闕觀寺城池苑囿倉廩府庫天下之巨麗大觀咸在焉何往非景何景非勝今以景標非七非九恰亦曰八愚意其有所依倣也舊聞方公詩重行易水三關路為欠燕山八景詩求其詩無有及聞此賦題訪之久

遊燕山之君子訊其說既未詳訪其圖亦不可得登高
能賦親登覽而後能也然且難能矧未嘗登覽而欲賦
之不過想像焉耳宋玉想像而賦高唐乃述夢境本無
實事徒肆虛辭如画鬼神孰從而究詰之今欲以虛辭
賦實景識者苟撫實景以非虛辭不待離婁子吹毛議
之而知其不可矣昔東坡據孔宗翰南康八景圖而詩
之後得親覽方知前詩未能道其萬一此不過謂按圖
不如親見之的必不差也今茲八景一景自是一題乃

合八景而總賦之親見尚難况臆度乎遍閱諸作幾于
遭困雕虛画空喑喑爭鳴想家家自謂升屈宋之堂人
人自謂入揚班之室矣一樣手段誰分優劣者凡數卷
謂超出耶無可點謂不逮耶無可疵賞僅五名棄捐不
可也前列亦不可也反復參校難得一魁礪字號效晉
問體者氣雄識高辭騁力膽惜改金壺為金臺白壁之
瑕端在乎此愚聞金壺夕炷本曰道陵夕炷劉太常此
景詩曰陵前高樹樹前山山外秋天日向殘草帶餘暉

侵石馬水逢迴影下銀灘平時只道雄圖遠身後那知
劫火寒今古行人欲廣路不堪回首重悲嘆又聞宋梅
洞豪賦燕山八景之六缺不賦者二景自謂薊門飛雨
道陵晚照懼涉悲慨不足以鳴今日太平之盛以是觀
之蓋如穀南陵夏后臯墓之類不過以金壺替道陵二
字而其地之勝景未始易也何得自以金臺并其地而
易之燕昭之臺安得今尚留遺跡如相如琴臺比乎強
行指射且圖好說可不可也又按范公致能北征集有

盧溝一首註云盧溝去燕山三十五里此河宋敏求謂之盧菰河即桑乾河也今謂之盧溝河詩曰艸艸興梁枕水低玩此語則其時無今時之壯麗可知又燕賓館一首注云至之日適以重九伴使酌酒相勸西望諸山皆縞云初六日大雪讀石湖此詩方略得盧溝西山二景著落遊京師者必能如范公之辭章大家有眼力有考究方得諸景之實逐逐軟紅塵中實未嘗著意觀覽攷究而漫曰吾嘗遊嘗見不可也躊躇累日不得已

仍以此號為冠如廣厦一區材木間架規模實壓諸屋
見屋中偶有窗壁不完好處乃因此以次焉之屋完整
者壓之何以聳過者之觀瞻乎此公能服義而勇改焉
斯為無瑕之璧矣其次碩字號音調擬騷良不易得非
靈均之賦千回萬轉于胸次口角未易辨此拔以為次
然後以次品第之極知僭踰惟諸公恕察焉幸甚

黥川會友吟盟考評

休陽東阜叟陳櫟辱小桃源君子寄聲謂將興詩盟求

一詩題併委以考評辭不獲見今秋滿眼有豐稔意遂以大有年為題以復命蓋為今日之願也按春秋二百四十二年而有年僅一書見于桓公之三年大有年僅一書見于宣公之十有六年公羊氏曰有年何以書以喜書也大有年何以書亦以喜書也曰有年何僅有年也曰大有年何大豐年也僅有年亦足以當喜乎特有年也何休註恃賴也若桓之行而元年水二年耗賴得五穀皆有使百姓安土樂業故喜而書之不足于桓公

微意已見至泰山孫氏著春秋發微始有紀異之意實自公羊之傳而發之耳伊川春秋傳遂明言之胡氏傳又申言之是固然也而不必泥也朱子效春秋為通鑑綱目一千三百六十二年中大統之世以大有年書前纔一見于漢顯宗之永平九年後又見于唐太宗之貞觀四年亦以為紀異可乎以是知大豐稔之祥自虞周盛時土穀維修綏萬邦屢豐年以後真天地間希濶之逢不常見也不常見而獲見心天地命民生之大君子

安得不深喜而樂道之此蓋願豐老杜之心未易與區區事仄平平者言之也茲承示及吟盟一宗以篇計者二百三十有七披閱連日惟重嘆嗟豈不欲體主盟君子之盛心多拔其尤尚凜凜于一名之難得而況其餘乎詩以時言未易言也陸山陰得之曾文清曰律令合時方妥貼工夫深處却平夸今求妥貼平正者何寥寥而粗鄙疵類者何紛紛也就中銓次凡如千篇各見于後幸有當行詩翁如存菴胡先生相與同考評審訂

之庶幾免于戾乎惟平心服義之君子恕察之泰定四年丁卯閏九月書於瑯溪寓館

丁祭孔子大成至聖文宣王文

恭惟道統遠自羲軒集厥大成允屬文宣立天地心太平萬世學校通祀聿嚴牲幣春丁釋奠禮嚴故常教行淮甸烈烈耿光

丁祭顏子克國公文

聖徒三千疇居其一惟吾顏子好學無匹樂在陋巷生

第一簞沒胙充國上公萬年春丁從祀公為之首誰云
絕塵瞠若其後

丁祭曾子沂國公文

單傳聖道卓哉沂國省身則三貫道以一想當童冠從
浴乎沂沒逢聖明胙土享之從祀春丁公居其次有司
告虔籩豆之事

丁祭子思成國公文

大學戶庭始師曾子中庸間奧卒光先祖玄聖聞孫道

賴以傳錫土成國從祀萬年是祖是孫相為悠久齊明
永祀洋洋不朽

丁祭孟子鄒國公文

洪惟亞聖道繼闕里言必稱堯功不下禹生為鄒人沒
封鄒公謂沒不傳傳永無窮丁祀先聖四公並配公踵
三公洋洋乎如在

祭越國汪公文

惟公秀鍾乳溪生稟間氣保鄉井也以仁歸有唐也以

義生為英雄作牧六州宜其沒為明神而恩封八字也
惟吾古歛公父母邦功德所單厚於他方烏聊之外行
祠相望苦竹叢祠威靈孔彰有禱必應在上洋洋吾里
焉依多壽而康合茲四民降之百祥衆心蟻慕其何敢
忘兌秋奉迎厥有故常神馭遍遊爾界此疆成始成終
豐年穰穰有牲在俎有酒在觴七獻既備明德薦香我
民報事兮歲復歲自今兮欽于世世尚饗

祭曹宏齋文

延祐二年歲次乙卯五月戊申朔越十日丁巳契家姪
陳櫟謹以絮鷄之奠致祭於判簿宏齋先生曹公之靈
嗚呼吾郡鉅儒方公萬里疇其亞之曰曹夫子三百餘
年泚我豐芑長育涵濡式克有此止齋之大晦菴之理
萬選萬中及游肯綮已未別闡以次名擬官題小誤暫
尼芳趾戊辰高科筮仕方始使早十年明堂杞梓豈近
鼎草勾稽而止此何足言言聊爾爾倦仕養親蘭膳嘉
肴僅長紉陽爰淑多士元祐全人無瑕可指方之方公

節尤奇偉不為公惜翻為公喜學者宗師斯文統紀永
棟孔堂願何窮已忽乃風傳公疾不起驚呼失聲吾願
已矣年開九袞壽筭誰比孫枝六人家聲演迤立言不
朽名垂千祀知足不辱公無憾只櫟也仰公昉自稚齒
四十有五始獲望履一見賞識極辭褒美昔人悔恨無
一知己知已有公一焉已侈奉書必答答書盈几僅僅
去年疎奉尺紙一再留札疎此之以念欲哭公香裊一
縷羈縻未前愧汗如洗除喪來前越人可恥徐稚絮鷄

誠哀其非公乎如生莫觴應主嗚呼尚饗

祭胡雙湖文

嗚呼儒者明經莫難於易先生家學易乃世習易百十
家不輕所宗啟蒙本義獨宗晦翁晦翁十八以易薦鶚
先生亦然可覘家學晦翁著書以身之退先生著書以
身之贅大肆其力幾絕韋編附錄纂註海內廣傳玉齋
為父雙湖為子啟蒙通釋並傳濟美景伯父子俱註左
氏名傳書亡豈公家比又以餘力明晦翁詩雖未拜讀

以易可知悔翁忠臣先生其一以儒明經功孰與匹方
壽斯文棟孔子堂訃音忽傳有淚其滂嗚呼我侍先生
自丁酉歲邇年以來罕得聚首泰山北斗心常瞻仰自
京南歸書問屢傳近者秋孟先生賜訪留僅七日莫淹
歸鞅期以秋季為我再來將一月留方賦歸哉僅辱遣
書賜一經紀忽忽奉答尚邀再至十月下旬董君走伴
報公捐館臨沒寄聲欲托以孫來我家塾平生于人諾
無敢宿蓋恐來春之官古荆尚俟商略方報芻靈髹漆

之諾茲用掛劒表平生好將以薄奠嗚呼先生之壽垂
及古希先生之書千古昭垂乾坤若毀大易方已名與
易俱可無憾矣下見玉齋心事昭彰父子相繼為脩文
郎吾文不文寫先生心先生如生褒如欣欣尚饗

祭倪元甫文

昔倪公寬西漢名卿近倪公思詞科之英千乘名家久
望吾邑潛而未躍世有隱德惟君之生鄉稱善人當躋
上壽以庇族姻壽僅中年天不可必日月踰邁祥琴倏

及君身雖去君家自昌北堂主婦成立諸郎久潛將耀
天終可必君之家聲當振他日芻靈之撤先罔聞知庶
饒欲奠已恨後時蔬素一觴率焉是愧寄哀斯文用開
君意

先妣撤几祭文

維元貞二年太歲丙申六月戊戌朔越七日甲辰孤哀
男櫟暨媳婦朱氏孫炤姪孫勲女孫某娘等謹以薄奠
敬祭於先妣孺人汪氏之靈而言曰嗚呼哀哉甲午二

月母棄其兒二十七朔倏忽遇之世人處茲追薦凡幾
悠悠癡兒乃止如此固吾家法世不用僧子孫謹守不
敢不行然念吾母一生行善可必逍遙奚事追薦所以
此等一切掃除惟極哀慕遽越居諸奉親居鄉迄今無
屋迫窄隘陋容膝不足以故几筵無所於安雖強安之
褻慢弗嚴擬于今秋建廬墓側不免先時几筵是撤高
祖之墓考妣祔藏餘地可廬或云允臧先考存日謀居
此地今焉卜居實承先志几筵更留能幾何時指日廬

墓朝夕瞻依吾母陰相使即就緒畢世守墓報親其庶
撤几薄奠母舉斯觴附我祖考百世蒸嘗嗚呼哀哉尚
饗

先考卒哭祭文

嗚呼父棄諸孤若昨日耳日月迅速百日倏臨以日辰
言雖曰盈百此心哀慕則如初焉聞之儀禮古者士三
日而殯三月而葬葬而三虞遂卒哭以此知百日卒哭
士喪禮也今皆知百日卒哭之期而鮮察三月而葬始

行卒哭之禮去古既遠古禮不明非一日矣吾父之生
允為吉人天實相之宜得吉地三田之塋明年始宜厥
今三月已逾雖未能襄事然將以下元後一日祇奉靈
柩出殯新亭是亦酌古禮而權行之也疏素一奠惟吾
父鑒之尚饗

小祥祭文

嗚呼人子喪親期而小祥練冠緇緣儀禮昭彰雖腰經
之猶在而首經之已除蓋其除也以漸此古禮也去古

既遠禮制不明其除之也以頓不以漸雖按小祥之期
不復講練冠之禮惟追薦而已矣恭惟某鄉稱善人備
全衆善力行終身其生也逍遙其化也亦逍遙理之必
然者也日月迅速轉盼期年時序雖遷哀慕罔極無沉
淪之于下奚假于薦拔自臨之在上奚待於超昇蔬素
一奠以表哀悰惟鑒之尚饗

大祥祭文

嗚呼某居廬讀禮有感于戴記之言曰三年之喪二十

五月而畢先王為之立中制節賢者不得過不肖者不得不及又二十五月之外加禫服二月此禮家所以有二十七朔之說也今諸孤遭先君之喪亦既二十七朔矣雖猶不忍除而不能不除者實以幼妹之于歸故也古禮女二十而嫁遭大故則二十三而嫁幼妹年亦既二十有五標梅及時可復緩乎此先君存日所切切于懷者今茲所以黽勉於祥除蓋欲盡先君未終之事也又有感於戴記之言曰直祭祝於主索祭祝于祊不知

神之所在於彼乎於此乎先君既沒為神為靈新宅祖宅俱安几筵今即禮記之言求古人制禮之意幽明道隔不審先君神靈其的在新宅歟抑的在祖宅歟此孝子求神所以不厭其備也所以既祭於祖宅又祭於新宅雖蔬素之奠不一祭其表哀誠則唯一耳尊靈不昧其終鑒之尚饗

祭社祝文

天下通祀實惟社稷古禮僅存此乃其一粉榆壇壝何

里不然簪纓之族況我藤川詩歌載芟又逢春戊牲肥
酒香告虔敢後祈穀本意願大有年更祈神休福祉綿
綿

正初拜墓祝文

竊惟善積餘慶德盛流芳祖宗之靈乎後既垂裕而愈
昌後人之承乎前宜永久而不忘惟我高祖與妣同歲
鬱鬱佳城數世相望前巨石之對峙嬾日月兮齊光子
孫近乎百人迨九世而無疆歲初拜掃厥有故常醪羞

將誠明德薦香

春社祝文

時惟孟春雨露既濡履之怵惕遠焉是追恭惟祖宗流
家德厚子孫綿綿先訓克守實藉餘慶宅宅田田四時
祭祀敢有不虔享于克誠絜盛董如錫茲福祉春風和
舉尚饗

秋嘗祝文

是翻白雪秋祭曰嘗先祭後食獻豐年香恭惟祖宗締

創已久子孫所殖先疇田畝殆無一飯非先所遺秋必
嘗新何敢忽諸啄黍鷄黃浮觴蟻綠永言無數千秋傲
福

臘祭祝文

古者歲祀在冬曰烝士庶報本此尤匪輕祖宗積德以
有今日謹身奉公何敢不力三時勤勞幸及歲終陰相
默扶賴吾祖宗粢潔牲肥薦茲祀事無怠其始欽于歲
歲

藤溪社迎新祝文

歲且肇新禮宜謹始遵迎景貺仰藉神庥茲爾上辛用
昭常祀牲酒既備詞祝謂何一歲之內一鄉之中願無
水旱無蟲螟而農事以登無災沴無疾疫而戶口以寧
俾畜而繁俾求而遂俾謀而成俾作而利俾幼而慧俾
學而明俾士而達俾祿而壽俾閨門之怡怡俾族黨之
秩秩俾子孫之繩繩俾福嘏之穰穰而神其長享

定宇集卷十四

欽定四庫全書

定宇集卷十五

元 陳櫟 撰

陳氏譜略

陳氏本始

記曰武王克商封舜之後於陳則陳虞帝之後也始封之君曰胡公滿自是以國為氏魯莊公二十二年陳公子完奔齊子孫為齊卿因得其政其初卜辭曰有媯之後將育于姜筮辭曰此其代陳有國乎不在此其在異

國必姜姓也春秋之末陳為楚所并而姜姓之齊果為陳所代陳成子之曾孫曰大公和遂改姓田氏則仍陳姓而不改者其在陳國之子孫乎

前代姓陳人

自古姓陳人按史記前漢書有陳杞完涉餘平萬年咸湯遵後漢書有陳俊元寵忠禪龜寔紀蕃重三國志有陳登羣矯震武晉書有陳騫興頤壽儒林傳陳邵南史有陳武帝霸先慶之昕暄北史有陳建子康茂稜儒林

傳陳竒隋書有陳孝意唐書有陳叔達子昂元禮諫
行君賓京希烈少游宋朝有希夸先生陳搏江州義門

陳旭蘊古

聚居二百年
家二十石

陳堯叟堯咨堯佐前乎此而雜

見他書與後乎此者不可勝紀今姑略之類出潁川汝
南下邳廣陵東海河南六望世之拘譜其族往往強附
于前代聞人以侈大之世代悠遠實不可詳今不取所
以述諸史陳姓人者欲兒輩知前代吾姓有如許人耳
吾家藤溪之始祖自桐廬而遷新安二郡皆揚州之所

統則吾宗望出廣陵意其或然云

始祖鬲山府君

始祖鬲山府君諱禧唐僖宗時避廣明之亂自桐廬郡
泝流而上至新安郡休寧之西曰藤溪里愛其谿山之
清竒因家焉其後子孫益蕃一村無二姓故人稱是村
曰陳村府君之始遷也泛宅浮家託于漁釣積德敦義
鄉稱善人沒葬於縣之南地曰鬲山歲益久一方之民
神之乃創廟墓傍尸而祝之凡水旱必禱焉東作不祀

府君不敢興西成不祀府君不敢食子孫之祀之有不
如鬲山之民之祀者視桐鄉之於朱邑庶幾焉且諸鄉
大姓之祖有廟食者矣程忠壯公是也有墓祭者矣孫
王墓是也彼其生也或貴為大將或南面稱孤沒而為
神固其所宜也若府君生無位于時託為烟波之釣叟
沒乃神于後永為樹藝之田祖其亦靈異也已民報事
兮無怠其始自今兮欽于世世鬲山成塵溪水絕府君
之祠始應歆耳傳曰盛德必百世祀虞之世數未也府

君為虞之子孫其亦蒙盛德之餘澤而百世祀者與

本房先世事略

先高祖之祖諱天寵字德承行第三娶金氏公勤儉慈愛該博練達田疇甲一鄉紹興二十三年徼行經界公為一鄉首今簿書契券四至列公名者無數發廩遇雨必糶穀之乾者凡可及人唯力是視婺源王公炎之初年客公塾創一簿題曰待問王公遇書有不通事有可疑悉條列之候伺公出而問焉按社籍紹興二十六年

丙子陳福政為社師記其年八十八公為社宿年必亞
之三十二年壬午公始卒相傳謂公年七十餘信矣
高祖之父諱嘉謨字少臯行第六娶同邑渭橋吳氏公
以錫類恩授迪功郎能世其學某嘗見翁一帖答新塗
宰字呼之曰信臣其字畫遒勁詞語典古曾祖以下之
字皆不及焉高祖諱有章字朝美行第三娶渭橋吳
氏中年納後房王氏杭人生先曾祖公好善而文世濟
其美其生也祖視之曰保家之主也遺文可見者僅祝

文一篇今見社籍中卒于淳熙五年戊戌十有一月七日高祖妣卒於紹熙四年癸丑九月二十有七日王氏卒於紹熙五年甲寅六月二十有一日前是族譜未用老泉蘓公條例故高祖以上享年幾某日卒俱不備知可知者曾祖以下而已曾祖諱伯全字全叔行第六五娶渭橋吳氏公天性樂易於生業不屑為祖居叔氏居之曾祖妣出所藏當三錢創屋三重別居時里之惡少曰橫八包者盜人之牛將屠之公執里役陳之邑

給榜戢其姦惡少恨焉持屠刀欲害公一忠僕曰陳簡
奮身衛公斃惡少於一杖下卒全此僕罪僅編管公嘗
語人吾遭此橫逆巾未嘗去首也先業為始破自是家
漸落屋亦他售數世之業墜焉然公詩酒自娛不為芥
蒂善歌詞且善填之先考嘗以公詠火種古詩教櫟于
髫齡時今猶記一詠曰一點若星眇傳薪遍寰海味斯
言似若借以自喻且有望于後之人者嗜藏書分析遷
徙散亡殆盡今猶有存焉生于紹興二十二年壬午卒

於淳祐元年辛丑二月二日享年八十曾祖妣生於紹興二十五年乙亥卒于嘉定十七年甲申十有一月二十有三日享年七十先祖諱慶大字士俊行第六八娶渭橋吳氏以姪女從姑自祖妣以上三世則然矣三子長先考次先叔諱履正字德之次諱晉出繼歛潘氏先祖遭家中否將變通於既窮售祖妣奩珥以買田以贏子錢鄉人朱氏子貸以乘桴桴漂人逝錢以烏有近族居鄉南五城當孔道欲依以開肆紹定元年戊子

祖妣又倒奩珥之餘相先祖遷焉力可買屋且嘗有贏
錢貸人買屋而已終僦屋以居開肆如韓伯休售藥以
謀什一曾祖晚年始就養故曾祖先祖祖妣皆歿
於五城慕返塋於周之義皆塋於陳村從先志也
祖妣慈惠敏明自幼知書孝經語孟皆誦甚熟且能記
歌行雅詞櫟之幼也未嘗學前祖妣已口授之孝經語
孟矣故櫟五歲已能背誦論語及歌行古文實祖妣之
訓也先祖生于淳熙九年壬寅卒于寶祐四年丙辰十

有一月四日享年七十有五祖妣生于淳熙十年癸卯卒于咸淳二年丙寅九月十有九日享年八十有四先考諱履長字復之晚年更諱源長從學者號之曰復齋行第五十娶同邑旌城汪氏先產二男二女皆不育暨生櫟先考年四十有二矣二女適吳惟深葉應宗先考之幼也遭家否極篤志勤學年十七從諸叔游淮因假館焉歸則先祖遷矣家益落故終身假館凡六十年從游二百餘人父子兩世從之比比櫟年七歲先考

則挾以自隨教之靡不至年十五已為饑所驅束父書以出年十六始請舉子課於黃常甫先生固賴先生點化之而父子自師友實為之本也先考少習書外家諸舅有春秋學因改習春秋熟于春秋三傳於左氏尤熟櫟每問事不休應口輒答某公某年也櫟年未三十時嘗倣柳子非國語體作一書是非左氏傳以首數條質之先考先考謂曰汝未洞究春秋三傳國語未可為此歐陽公曰著述須待老積勤宜少時汝其戒之櫟聞言

汗流亟秉畀炎火至今不敢為凡先考所以成其子者類如此平生待人平直畧無城府鄉稱善人先外祖汪公諱煒有學有文先母舅諱定老資俊甚弱冠工舉子業今其遺墨尚存不幸早世先考哭之極哀歲癸丑外祖歿其將歿也先考往省之告之曰公不幸無孫今幸有外孫某當世公家祀詔外孫無忘公其勿以餒而為感外祖頷之故先考世必修外祀櫟奉治命惟謹不以菲廢禮焉先考事親孝養祖妣也力不逮心諄諄以缺

甘旨為愧祖妣開譬婉而真誠所謂啜菽飲水盡其歡
者歲丙寅祖妣歿已已謀葬事是年先叔以力不能辦
欲緩之先考曰葬親何事也吾當力搏節以辦此自買
舟以往一切以為已任毫髮不以諉先叔卒襄事平生
好傳藥方有疾或以問必以已驗者教之不少靳多以
取效既歿鄉人感小疾者多追思之凡此皆一節一行
之可紀者先是歲乙亥孔道軍旅擾擾先考始挈家自
五城歸祖里距先祖之遷五十有八年天道六十年必

復意者其有數乎始歸無所於居得屋不容膝然先考
安焉素耐勤苦年高矣視不昏編寫無虛日卒之前數
日燈下尚蠅頭細書卒之前一日尚自作客問時櫟館
中澤見家問知先考小風寒亟走歸省歸至先考已不
能言矣實至元二十四年丁亥二月二十九日申時也
先考生於嘉定四年辛未十一月冬至日丑時享年七
十有七先妣蚤多疾灼艾黃逾千壯晚彌閒健慈愛
平直始終以之生於嘉定十三年庚辰五月十一日申

時歿於至元二十一年甲午二月二十八日巳時享年七十有五凡吾先世之事大略如此嗟乎自始祖府君十有八世而至櫟他房有以儒學顯者而本房獨無有然洪範五福貴不與焉數世以來壽皆八九十無下七十者祖與妣偕老無再娶者父子皆親傳無祝嘏者皆稱善人無一為人所指者良可表於道曰處士陳君之墓有儒學而不顯安足計哉又自曾祖以上世潤其屋降是窶殊甚然家雖空而行頗實口雖羹藜飯糗之不

給而經炊史酌之味無窮貧亦安足計哉所大懼者氣
薄蚤衰兒輩才下志怠或隕其家聲焉耳記曰其先祖
無美而稱之是誣也有善而弗知不明也知而弗傳不
仁也此三者君子之所恥也謹因續編族譜而略述祖
考遺事以示兒輩使知予家數世儒學之相繼庶幾其
能善繼云吾家四世以來得古意者又有一節先曾
祖平生不好佛故治命命先祖曰如我死喪葬其略
參用古今禮謹毋作佛事先考先叔所以喪先祖祖

妣不肖所以喪考妣皆不敢變焉大抵此說儒者知之者多而能行之者寡不搖於俗論則奪於婦人先考之歿也來弔者見勉曰縱不齋佛亦必聲鐘應之曰升屋而號告曰臯某復此儒家之聲鐘也欲聲佛家之無常鐘也何為又有曰縱不為佛事亦必填受生又應之曰民受天地之中以生夙興夜寐無忝爾所生此儒家之填受生也以紙寓錢填受生也何為此不肖所以不搖於俗論者也吳氏女兄明敏知書習聞家法

固無異論吾婦朱其父兄信佛甚亦化之無異論焉此
不肖所以不奪於婦人者也昔程子曰吾家治喪不用
浮屠洛中亦有一二人家化之近年同邑求邇范公歛
邑古梅吳公之家皆然然程子大賢范吳富者人無敢
非之吾家三世不幸皆貧流俗不過曰是貧甚不能為
故立異耳嗟乎安得家肥屋潤更酌古禮行之以一洗
流俗之言哉又嘗聞士友之言曰平昔非不知佛事不
足為古禮所當用一旦不幸至于大故則族姻交以不

孝責我雖欲不為不可得已嗟乎佛入中原祭禮荒胡
僧奏樂孤子忙後邨劉公嘆之久矣孝也者其作佛事
之謂與流俗之所謂不孝也乃我之所謂孝也流俗之
所謂孝也乃我之所謂不孝也兒輩聽之不守家法非
吾子孫吾豈惟望爾之不敢變哉將世世望子孫無變
也櫟謹書

福州通判

公諱慶勉字志問應城尉親兄之子也以詩經應甲子

鄉舉紹定五年壬辰徐元杰榜第三甲出身調廬州舒城縣尉監浦東鹽場韶州推官鄂州蒲圻縣丞福州簽判兼西外宗寺簿湖南轉運司主管文字武岡軍通州不上換福州通判未上卒累官至宣議郎生於淳熙十年癸卯卒于景定二年辛酉享年七十有九公學正文粹誠而謹畏儉而廉勤櫟猶及見之與貢元公應午兄弟自為師友貢元公遂亦以詩經中甲午鄉舉四方從學者衆亦有平林之遺風其所授於人者皆其受于兄

者也公擢第年已五十及宦游深受知于信菴趙公葵
于仕進澹如也以清白遺子孫六藝之學三世不墜其
孫尚有聲士林云遺文不暇詳錄略見于後

入仕者二十二人入大學者十人請舉不中第八仕入
官者七人

雜識

吾宗以儒學略自見者亦既書于前矣聞之方陳氏人
物盛時村無二姓合族稅錢以貫計者一千三百有奇

讀書者比屋各家之老遇風月良夜杯酒相叙飲罷步街上聽子弟絃誦聲自邨首至尾聲東西相震以是快愜為樂事每歲秋賦終場可讀之卷幾七十以故方解額窄時連數舉無脫計偕者此外有齒有德而潛隱不耀如餘姚宰之曾祖珪年餘九十漫翁謂鄉人號之曰佛者尤多有之顧愚之生也晚未及搜訪而備錄焉謹開其端存一條于此以俟同宗之君子凡先世之有一節一行一善言善事之可書以為訓者各以所聞續錄

之云

陳邨里名騰溪非也百川沸騰詩人所傷溪何取於騰
哉洪野處士書為滕溪亦非按吾里有山曰滕溪嶺舊
多產青藤嶺巋然溪傍溪實遶其麓故嶺曰藤坑溪曰
藤溪信而有證又村名陳邨實以吾姓姓是邨也按是
村吾宗未居之先實名洪邨洪其姓者居之今田地文
簿洪村二字班班可見家中舊居土人猶以洪村坎頭
目之洪氏子孫後微為隸愚之少也猶見一家今併此

一家無之矣唐末以前以姓姓其村三四百年後子孫無唯類焉吾宗中否異姓有來居者而陳氏子孫終較多陳村之名亦永不磨意昔與鳩氏始居齊地而後太公因之太公之子孫固不能常如小白時其視與鳩之影響不存者大有間矣同宗有志之君子盍亦勉自樹立張吾家聲以求稱此村之名也哉

雲萍小錄

陳櫟字壽翁小名佳老行第三佳休寧縣千秋鄉之陳


邨生淳祐十二年壬子三月二十七日寅時曾祖諱慶
大字士俊考諱源長字復之妣同縣旌城汪氏荆室同
鄉回溪朱氏子男二人照字仲明己卯五月十一日未
時生行第得一勲擬字仲成甲申五月二十一日寅時
生行第得三先叔之子棣早世無後先孀石氏命勲後
之一女許適吳氏甥彬仲文家世居陳邨先六世祖諱
寵即洪野處士誌尚書程母夫人墓所謂處士與之親
兄也田產甲千秋一鄉三傳至曾先祖家益落至紹定

戊子先祖以從弟運官一房居同鄉之五城當南五嶺
孔道可開肆略謀生遷依之故櫟生于五城至乙亥歲
笳鼓數驚而祖里稍僻靜先君遂自五城遷居陳邨焉
櫟自七歲至十四歲侍先君遊學年十五饑驅之僭為
童子師自此竟不能舍堅苦蹉跎無從質正歲辛卯年
四十矣僭和虛谷方公上南行詩偶得轉聞于判簿宏
齋先生曹公聞先生頗稱嘉之櫟于先生自少景慕不
啻水之江星之斗也丙申二月入泮道過長林橋因納

謁拜館下先生欣然與進降屈年德如平生歡自此相
獎借訓誨者甚至雖察父哲兄之我愛良不是過自丙
申至庚子無歲不見無月不書愛之有加焉無替也近
秋丁一再上謁其還也蒙力留之館中且云嗣歲確佚
老於家嗣春未必可會晤可不留一惜別乎因不敢辭
入夜縱談忽出一紙首題曰雲萍小錄乃叙述家世及
平生及賢子孫以賜教者也且令櫟亦書世家以呈櫟
思之雲萍小錄所以叙交好示久遠也非敵已不當書

非稍有可書不敢書雖今者先生忘年而下交之先世
自唐末由嚴陵遷陳邨迄於今登科者一族凡六人而
櫟一派累世不仕櫟也自揆晚末上交何敢僭不足乎
揚雲萍之至又何敢僭然念先生謙恭之盛德出于真
誠有如夫子之于人常俯而就之者既忘其尊而以是
先施之櫟苟輕愛不述以報則真頑冥不靈也已因敢
忘其卑而書以呈焉併以呈希仁希文二兄長其無曰
是子是錄多見其不知量也則幸甚幸甚大德庚子八

月二十一日契家姪陳櫟百拜謹呈



定宇集卷十五

欽定四庫全書

集部
定字集卷十六

詳校官中書臣賈錢

侍讀臣孫球覆勘

總校官編修臣王燕緒

校對官修撰臣吳錫齡

謄錄監生臣楊其梓

欽定四庫全書

定宇集卷十六

元 陳櫟 撰

五言古

自咏百七十韻

祖宗世種德生我異羣兒憶當五歲前教者祖父慈未
識蒙孝字先誦蒙孝辭詹兄曰梅哥厥母吾母姨先父
加之冠專為脩百芝句讀熟魯論徹章葢冬初冬仲大
父歿舅翁弔總惟愛我撫我頂聽我誦學而琅琅盡鄉

黨繼誦尚忘疲舅翁謂之止稱是天上麒麟六歲所從怪
飯罷出遊嬉謂我頑如石不教專扑簪七歲侍先父三
載臨溪渚辛酉從仲黃五月學破題進進待解盟小冒
漸能為壬戌至甲子隨侍東復西詹溪友四程英才推
一時幸甚相切磋愛我深相期臞山謂有子延我為塾
師初聞賦戲言馬耳東風吹先父習麟經授我孔壁書
謂徽後洙泗四書教令披丙寅年十五遽為饑所驅束
書團圓山童生八人隨孜孜不敢怠夜檠逮鳴鷄次年

館湖干老稚荷提撕請題草窻翁許我文鮮疵朱書勉
精省程文教力追是年槐花黃祖母服未除先父不及
試族叔同旅厨一筆了三場不遭曳白譏庚午亦失解
銳氣能不萎故鄉處族館族弟汗血駒麗澤用其名先
登登弧麾四經卷卷悉清言書魏魏鉅公汪溪陽文衡
省監持氣象許宏濶辭意稱豐腴謂雖在廣場亦當先
列適此文與此批見者誰敢非自此有餘力書外兼寄
詩小啟見必勇輩儕避旌徽癸酉書題難立說及者希

考官勾龍戶

勾龍
震子

一批擬指予清才不易得斷題無可

疑但分前後聖不合襲省闈次年赴混補萬人場並馳
二十三後生難得人信諸吳君託以卷日中文摠搗非
此三百繆何以瞻其歸壁流既問津謂將濶步趨豈意
三百年科目止於斯屠龍成無用躍鳳蔚何施昨雖舉
業習畢力不在茲古文壯氣骨性理窮淵微乙亥館江
潭諸友交見推刺口讒吟哦閨如喧蜜脾我獨默其間
抱葉寒蟬如不屑涉淺流尋源浩無涯風雅騷選降唐

宋星秋輝凡諸大家數一一加嚙嚙然詩有別才天分
終較早經膏與理髓聖賢示我規精力詩中盡毋乃一
生癡心不能兩重此昂彼必低定見下退轉江潭而詹
溪臞山踐前言聘幣及吾廬所幸有子姪皆有受道資
一坐閱八年膠漆久不渝藉其綱維力數畝買山畬惟
此八年中哭父衰厥衣終喪采泮芹泮師林岩居其人
數傲睨見我加稱譽月書季考文許我白衆眉以啟贊
兩馮交答壘應麓繼此諸教官見待略等夸殿謁不我

責羹牆見宣尼辛卯客梧山一紀方別栖厄哉館渠口
書衣焚無餘壬子否欲泰煥身陽岡曦甲寅科詔頒鳶
魚均躍飛科停四十年壯哲已老鰥行年六十二可喜
亦可吁甲戌別西湖一舫重漣漪簪筆漫入場誰識兀
孤羆已過田光年老醜亦如之理精文亦熟執餅啜茗
甕游戲日中了跳出門限危吾友謂必中不答笑支頤
歸過菊節後風傳鷄橫颺是時未揭曉無乃鬼揶揄既
而果爾中廁我濫吹竽一朝省檄下初欲推病軀勸駕

者張侯自枉五馬車敦請上長林急下亦筍輿下馬握手語滿面春熙熙次日燕之泮禮意逾勤渠刻日再詣府歸辦衣糧齋豈謂不後先主有鼓盆悲行無或使者

止泥莫陽機筍輿官給送杭解姑委蛇謀之鄧與王

鄧善

之司業王誠甫書吏

云子退何居進難退奚難稱病告錄司坊正

驗然否執牒還鄉閭一一如所教衆人皆笑嗤同榜有六人買舟浮泗沂二黃林盧王張子最後期五人恬是我平山獨嗟咨謂公機難逢自棄與人殊彼如翔雲鴻

我如墮泥鵑作序送之行命兒餞解維得者惟黃張失
亦恩不虛我倘與此試一得如摘髭萬一或失馬橫經
亦臯比然亦何足恨一笑返釣磯念彼得馬者輩辱醫
無肌何如天爵尊玉返避涅緇青紫耀目前老矣竟何
裨退無治生計耕經培根基丹鉛畢此生初志酬桑榆
糠粃從自飫道義甘前肥詩非吾所長世自有人奇亦
嘗印老方屬和枯蒙噓謂讀陳君作如見上天梯和公
上南行選刊尾瓊琚

方公上南行詩予嘗和寄弘齋弘齋達之方公公選五首附刊于集

吳甥仲文
曾見刊本

亦如岑高作得附杜拾遺終焉小剗闕巨刃
自有宜朱書天地心泝洙沿濂伊顯固日行天與難氷
釋漸坊本纂諸家動是醇雜醜後生為所銜望洋入無
蹊不用聖賢力天大難井窺不用朱子力海深測以蟲
十五已勵志熟誦精思維鑽研五十年熟考洞毫釐不
獲一時用遂欲百世垂四書精發明妙處繭抽絲如舉
標月指出彼黑暗迷纂疏蔡書傳饒董編區區厥子以
委我搜羅加補直成書付之刻謬妄刪支離附益諸異

說秋蘭著資苑四海有具眼喜想繼以嘻樂善胡雙湖
愛我志朱愚我有廣通略史纂蒙摘奇宋略摘最多亦
欠如貫珠此外所編述盈箱困毛錐詩記皆句釋記尤
其思攄十翼與四傳二經究麟義近撮六典要略如孔
孟姬嘗以夜繼晷古文圈點批杜詩亦寫註鑿鑿皆有
稽吳某借不還執以為已私五子節註評散落無依稀
四書與書記羣玉之璫璵三者倘行世豈曰小補與無
力可辦此有力將投誰生者不我重歿也應我思朽骨

相後人東坡豈吾欺知更幾寒暑了却老頭皮間氣更
誰鍾我亦自惜之當為百世士何但今布韋骨朽此心
傳腐寧草木俱從彼啄腐鼠舉頭嚇鵝雛年忽及先聖
七十加二暮使其止于此藉手見先儒使不止於此天
錫何敢辭三山林樂天談命當杭衢許我八十六此言
倘契繻教有最幼孫亦當挺梧枝到此反其真大笑與
世違

上白湛淵提學

名挺字廷玉

東坡慕香山今古不並世幸今遭人師演迤香山喬港
乎靚深淵淵深漾微瀾匪直紹長慶殆將登社壇豈曰
詩中傑道脉紹先哲手提斯文柄模範示江浙侯泮幾
芹宮邑校幾花封書院又凡幾於公統有宗卓哉儒宗
主非公誰玉汝教雨而豈徒行將霈霖雨

次馮秀石遊水西詩韻

人生無東西所歷貴適志辦與客遊山便是仙行地謫
仙所經過景物猶嫵媚壤壤為利往寂寂誰肯至蜀珍

非九流水西亦名寺人景盡雙清古今端一致文取意
氣合年忘少長異詩囊索高古理窟探幽邃麈尾屑霏
微兔絲墨漸漬諸友武庫森一老靈光歸戰忘大敵勇
見匪小巫懦安知馮長公非即李十二快飲頻張頤高
吟時擁鼻鍛鍊指獨敲曠望足雙企汲古綆垂深抽關
鑰開悶如聽簫韶鳳肯比蘭苕翠于時桐始花纔社秧
半時幽尋客正閒勤動農將勸花光目懶寓松陰身所
庇山僧氣如玉野樵色俱瘁倦坐席或爭佯入舍肯避

茶甌時復啜困魔詎能崇飽遊可無詩分韻各有字是
則摩詰畫何必柳州記我雖慙曾唯亦頗發顏喟朗誦
敢辭頻把玩不忍置實多句中眼兼審象外意靜閱神
已馳忘言必有醉僭和白雪調難抽亂雲思恨不尾清
遊吟成祇自愧

和方虛谷上南行十二首

虛翁上南行實庚寅十二月詩也辛卯六月客有自曹君
菊存所來者始傳而誦之絮羹久要之義聚星過從之勝

漢人不得專美於前矣雖恨不獲親聆其一時談麈之詳
然聞風興起亦可於此詩具姦兆之一二焉二三先生中
某所識者惟北山王先生茲敢不揣愚陋僭賡元韻賦一
十二首寫其平生景慕之私奉呈王先生或可以轉聞於
方曹二先生云

濟世萬古航乃今橫野渡由此訪故人勝著沙隄步我
傳紀行作冠珮與薇露何當叅詩禪一澣石頭路

右古航渡

又過分流岑行行足聊休流品分良難感此胡分流大
雅久不作梁棟儕薪樵蜩鳩笑鷗鵬一是逍遙遊

右分流嶺

南山得宣平名字可千載世無死仙人花瓢今定在家
山有此逢何必跨瀛海下視白雲衣蒼狗須臾改

右過南山

疇昔飲雙橋獨木寬法程如今過雙橋無復糟床聲橋
外吏人稀飲徒常二更追詠承平事略此記西京

右過雙橋

舊官榷酒去城十里始飲村
醪雙橋酒稍佳今復無有

扁舟泛古航昔常閱此奇盤屈公詩中眼明再見之二

孤恐飛來或乃巨靈移甚勿訛為姑又須訂茲茲

箕子
二孤

右岑山渡

杏花富趙邨佳名昉唐代酣酣紅雨春芳葩誰不愛轉
眼鐵爐步發問莫能對杏村無杏花趙村亦安在

右過杏村

坡覓牛矢路公渡牛矢嶺遂令污穢地居然化清境今

代曹子方陳三延癩頸何時躡吾履迢迢山路永

右過牛矢嶺

我未讀公詩久矣知葉有地非產此人人知此地否當
與君子鄉俱傳千載後風餐悶春陽高節且堅守

右過葉有嶺

和方虛谷二首

後漢袁與楊世公五或四袞衣苟有愧不如安楚製我
不識斯人聊復視其世不有此翁賢安得賢主器

又

天壤一虛叟見之夢寐中豈必真及門私淑恩何窮易
說曉櫺白詩編夜紫紅終然欠叅請小草依松風

寄曹弘齋

我不識弘齋識之文字間古風久蕭瑟一筆獨追還恨
如東魯人未得登東山振衣不自勇路亦非阻艱

寄王教授

書堂名博士得見未恨晚發揮紫陽論登峰造其巘仕

得四十强程方九萬遠北山勿移文秋桂芳風遣

送汪希道入都

并引

浮溪遠孫汪希道嘗為海北海南道廉訪司照磨沿
檄鞫洞蠻獄察註陷賊黨者千七百餘人直其枉悉
縱之幾以失出獲譴阻仕進餘十年今本心雖獲辨
明而歲月坐成晚矣抑又聞之古人一日養不以三
公換希道家貧親老以八十餘歲之壽母將待柳下
小官之寸祿以養之今將犯寒暑走萬里以求之豈

得已哉司銓衡之諸貴人仁也明也公也必將鑒君
之本心憐君之不得已君之得除得歸也有日矣臨
別哦古詩十八韻以餞

行行觸秋暑勇往觀國光脩途或濡滯一瞬北風涼不
仕餘十年養親竈罕煬將謁吏部選寸祿願少償庶略
助甘旨贖其不遑將不仕果何因憲幕嘗翱翔驅馳海
北南訊獄主慈祥註誤陷賊黨詰問加精詳活千七百
人解縱還善良幾以失出譴究竟靡濫臧久之天日開

歲月坐荒荒濂溪范參父議獄俱慨慷殺人求婦人母
乃欺穹蒼活千人有封君後必當昌安得當吾世而不
蒙薦揚當路願鑒之萱草癯北堂俾得早言歸為養及
壽康臨期重叮嚀白雲遙在望

次吳子靜韻

惟深

霜葉色偷韶風林聲借商秋清挾春熙君詩宜可方喚
醒十年夢栩栩延陵鄉富貴來徐徐春秋去堂堂魯鄒
二祖師身世猶遑遑吾道行何時魚目爭夜光

次韻子靜破靴

待漏靴滿霜履聲振雙闕行映火城紅不用掛殘月得
意彼何人步雅視亦濶豈知失意者糾糾履霜葛君其
但固窮祝阿迹將發破靴不須恥此恥會可刷朝靴三
尺脚穩向雲梯躡聽履上星辰押班晨賀雪

雙竹吟

瑞竹非凡物猗猗超綠綠昔者清獻公家園有雙竹雙
竹比兄弟永歌嘆不足因念世之人詡詡相笑逐誰似

孔融讓誰似姜肱宿鵠原與鴈行人反愧禽畜其豆同
根生相煎如泣哭豈復念兄弟同氣出父族何如此二
竿驚雷拂雲速雙清儼夸齊對立空洞腹墨君有此奇
可使食無肉大勝雙頭蓮不減同穎穀豈不見明皇遊
園感雙竹

文丞相

三百年社稷痛哉尤此公偷生皆負媿既殺即褒忠不
屈夸箕並罹殃巡杲同

題梅菴圖

即汪御史

詩書暨春秋於梅著其實捨實多言花後世富篇什花
耿冰雪面實蘊乾坤仁獨步衆芳中允矣菴中人勿徒
於其花名媿花御史實調相君鼎天下歸仁裏

贈葉君訥

定山葉君與余同生於淳祐壬子君侍其先君子遊
學五城余已識之既而君館東閣余館葉村相距密
邇交好不薄聞其有賢嗣尚未之識余子忽得其所

贈言來徵余一言忍付之默默乎泰定三年丙寅日

南至

放言易欲訥力行難欲敏孔訓朱子箋辭簡義淵永得
祿自有道言行俱當謹敏而濟以訥當言豈終隱取信
在言前何待矜口吻君子慎樞機相可冠班笋君家顯
與鼎前後作繩準發軔吏警曹勉旃推素蘊

四美堂詩

為悠山宗人作

壽富祿皆福壹是可言美意願本何極分限貴知體嘗

聞海中國太倉一稊米天莫限量我惟在此德耳德則
仁而壽德則富於義德則祿在中德則福順止德為衆
美基如堂必有址悠山吾宗秀厚德與山擬樂山壽如
山由壽享福祉富益不待言饑人望公庾祿為仕者奉
鯤化程萬里溢美公飲聞瞽言述其理吾聞諸詩人箕
子子思子愛助良區區山甫已能舉

七言古

題春先亭

春先亭初成胡脩存篆宋公梅花賦於其上櫟嘗和
宋韻成賦一篇今數年矣茲同敬存觀梅亭上復賦

古句

巖巖寒威薄穹昊搖落千林跡如掃受命獨秀除松柏
餘木僵立疑枯槁犯此祁寒敢著花先天下春梅獨早
姿冰質玉面嚴冷我見魏徵殊媚好為花作賦宋廣平
鐵石心腸本堅貞胡為乃作流麗語欲踵庾信肩徐陵
聞有此文莫能得僅見皮子加褒稱近世李君使交州

得諸塵壁輕連城未壯之年能賦此字抵珠璣辭綉綺
老宋賞其善體物比况會粹古羣女襲美倣之賦桃花
前作後述工摹擬繁華而有妖艷姿方之女子亦宜爾
我觀梅花如大賢天地閉時全其天羣表獨立超衆甫
高標孤絕無比肩孤竹伯子聖之清聞風凜凜頑皆廉
獨步戰國性善翁次庶幾焉魯仲連衆醉獨醒湘纍屈
苦節雪窖蘓屬國三國無儔葛武侯有晉徵士陶靖節
作者七人梅花徒賦中曷不勤招呼賴有永保貞固語

宋公相業茲為四字符

寄鄭耕岩

昌江鄭君耕岩戊申歲託余妹壻葉子轉詢晷閏說
余研精寄似今年矣延祐丙辰二月甲申客至自
古舒出一緘不省為何人寄久之方知耕岩也耕岩
小阮子謙僕忝同榜今耕岩索詩題其岩石柳陰卷
誼不容諉因賦柏梁體三十韻應命

古來隱士多躬耕身將隱矣焉用名巢由以降名著稱

皆違本志非真情真隱充隱分偽誠終南捷徑招譏評
隱而無名妙不勝詩之衆賸將驚霆君家子真當哀平
五侯霧塞黃冥冥此何如時可軒騰宜哉掉頭呼不應
遂使谷口聞西京名掛法言聲鏗鉤君其裔耶良錚錚
幾載龍舒以道鳴岩居高尚追芳馨時哉不同逢文明
胡忍被褐韜連城鄭公鄉想多豪英仲容方奮青雲程
曷不彈冠濯塵纓天風再秋鶚孤橫春浪紅暖翻飛輕
幡然堯舜君與眚他年身退當功成法疏廣受辭恩榮

明農岩下相攜行世有畫工傳丹青與今手卷雙合并
呈呂雲石提舉

在地為石天為星乾文爛然石之精一卷石山亦一體
况茲盤石雲倏生斂為膚寸舒彌大看作兜羅錦世界
時時敷布吐芳心黻黼崔巍相映帶相門出相世有人
暫司茗課槍旗春起為皇家壯柱石出雲為雨蘇民生
答汪靜齋

北辰所居環衆星動中間靜義尤精浮溪先生富孫子

名齋以靜惟先生天地中間理最大理欲須當明限界
無欲故靜叅濂溪窗草不除綠書帶且陪嗜學賢主
人搜腸千卷憑先春起佐明時開壽域願在域中為
一民

黃山水閣畫壁為金子範作

自有宇宙有此山相傳黃帝嘗躋攀山以黃名端自
此標出六六奇峰巒太古名山鎮吾歙連跨三州里
三百縱能多辨謝公屐費幾光陰幾跋涉何如圖向

素壁間隨意卧遊仍坐觀俛仰之間如登峰冒吞雲
夢同寬閒容城浮丘古仙子揖之為賓軒轅主對山
如接太古入勝與俗人相爾汝主人樂山希仁人識
此名山面目真何山又復古於此三王之世傳斯今
六六洞天何足數此六六峰最奇古日觴佳客此亭
中醇醴陶陶盎淳風

蠟梅

梅屋叔長示順安劉公蠟梅詩軸且令續貂伏

讀啟發多矣謹賡韻拜呈

蜜蜂三生有花癖獵遍梅兄與礬弟釀花為蠟蠟作
花吐向梅梢真蠟底蠟梅有詠首蘇黃絕唱後人誰
敢詆今代胡曾劉禹錫唱予和汝吟毫泚春風吹來
珠玉篇嘗鼎知嗣元和體恍然生我梅香前有味如
醺百花醴折花因復細端相山麝臍熏薇露洗萬木如
槁梅獨春太極初呈品彙抵此又梅中別出奇滴蠟
緘封春信啟翫花又復誦公詩喜佩服矣勤拜稽非

花母乃真蜜脾我將求古君臣禮蠟是真耶却又非
別花有眼眼幾昧

呈董掌書

董公仁義陳兩言基開漢劉四百年仲舒天人對三策
格心正論千載傳公家家聲塞宇宙江右儒林推海口
蘓黃帖刻志君堂晦翁新授盤澗叟以儒飾吏固可人
願推家學蘓生民豈惟近效著蓮幕行將大用垂朝紳
次韻呂周翰教授景濂亭觀蓮附仲文呈之

春桃飛盡紅雨繁夏槐更禪綠雲屯此時泮宮蓮萬柄
一一生自七星根愛蓮夫子振絕學道脉灰冷還以暄
翫花扁亭景濂字一洗紅粧象絢裙大者錢塘十里湖
小者齋外一瓦盆看作六郎見何猥此曹母乃迷禽門
子非愛蓮愛君子一寸膠清一寸渾對此水光晚色靜
如挹光霽醒神魂高出太乙真人舟坐袪大暑酷吏冤
如使徒于蓮景濂見道猶隔幾塵昏景濂真處在何許
夫子自有圖書存文公訓釋揭日月價重趙璧并魯璠

池蓮窗草皆寓爾圖書難盡意與言我徽文公舊闕里
派濂沂泗窮淵源君豈不見后山叟尚于六一稱嫡孫
宗朱祖周在吾黨景濂當作如是論甥其呈似呂先生
何當叅請師模尊

夜聞織

東隣西舍織燈明萬籟無聲此獨聲我何安逸彼何苦
軋軋未終雞已鳴目似鰥魚因不寐安知我煖因彼成

五言律

和汪監察梅菴詩

間氣所鍾聚兼由積善餘身閒知地勝神動覺天隨日
謂幽居好人疑大用遲浮溪家集裏盡與和諸詩

賡放翁有叟韻

有叟居東阜辛勤亦數椽文燈空照古筆耒不逢年我
已窮愁憤天無賦予全校讎與評議猶秉一朝權

壬辰十月初十日聞萬一叔以九月五日死于
淮出涕之餘賦此

邂逅遇所識歸來不奈愁時聞前輩死轉覺此生浮世

界空花夢乾坤落葉秋追思黃父語今日淚空流

于少居五

城叔每以苦語鞭策之

枕上用子靜冬夜韻

夜今六十刻熟睡若為謀髮禿已無本情恬忘莫愁樹
雲空憶李茶月孰驚周不寐集方感心期墮繆悠

次韻俞崇節和乃弟飲酒詩

有酒身無事多君與弟斟老猶具慶子閒作太平人讓

果同初意燃萁異慘吟終身思聽雨富貴不如貧

孫次臯寄示呈方公三詩用韻奉寄

學海渺烟浪泳游無盡期誰非鑽蠹簡鮮有辨難碑力
量公誠到聲名後必垂孟張匪韓子定有不卑卑

又

石鼎彌明老可孫劉與侯年光弦外急景物卷中留高
渺蘓門嘯雄空赤壁舟吟邊風韻似一詠一消愁

又

我與公相識俱當綠髮初
蒿微僭松倚枿槁愧陽虛
往慨悠悠別今方續續書
箋馳當簪盍自此不宜踈

次韻酒限

濡首起濡唇初慳後絕倫
勿耽雙玉酒遂溺萬金身
秦豕流生禍烝豚已泣神
古人多惜福惜福始全真

又

寧自三緘口從渠九醞觴
道中臻樂地酒裏覓仙鄉
勿以清明在而云發出狂
卿卿我自我醒醉兩相忘

次韻月卿姪藏曾祖硯

幸異元賓硯傳為子敬璫一生曾受用四世尚磨研
玉喜在山潤雲因不雨全文章無極盡餘澤及曾玄

遷新居有桃符曰自樂巷無陋由勤屋不華十
餘年矣炤壁未漆堦簷未砌丁未春始克為之
乃足前十字成一律

自樂巷無陋由勤屋不華桃符今幾載藜徑只貧家
唐世土階是虞時漆器奢門髹簷復砌於我事何加

哭方虛谷先生

丁未歲正月十四日卒于杭

目深窺理窟身獨據詩壇偏得古猶少兼全公不難槐
柯千里幻椿筭八旬寬癖愛湖山好郎君侍闔棺

壽達觀

五月五日

初度天然巧端陽不後先良辰逢五五壽算祝千千不
羨宮衣賜勤鋪角黍筵安期蒲九節更可引高年

穿井

按官歷十二月某日宜穿井是日開日也且井宿直

之吾家用工巧逢此日深二丈餘而得水喜而賦之

戊午
歲作

井宿值開日逢茲應再難真能九仞及頓覺百憂寬地
冷冬方煖冰湍夏更寒子孫又孫子啜飲有餘歡

有賦假儒真儒者今賦二首

儒立三才命其何以假為但矜麟作瑞已昧虎為皮氣
見大巫索才非男子奇誰司人物柄明辨勿遭欺

又

世固伸知己真儒始識真學將開百聖才可進千人卜
夏母為小賈山猶未純卞和明著眼席上果何珍

挽畢觀竹三首

家學淵源接人豪湖海稱問津遊壁水從宦到金陵蟻
夢炤千幻燕詒明一燈方將儀後進仙去理難憑

又

相觀惟有竹竹外懶凝眸早播無雙譽高交第一流裕
齋明藻鑑虛谷並英游知己陂龍化公宜不復留

又

我忝登門客悠悠十二春
鯉潭隨步屨馬鬣忍攀輪
域近從先正神安蔭後人
天晴表公福雨點不霑塵

挽洪簿二首

名炎祖

歛城虛谷後猶幸有斯人
學問師鄉老勾稽子邑民
丹鉛充度閣朱墨泥車輪
壽僅幾重卦遺文賴不泯

又

抱甕教多士于時識景星
多年嗟判袂幾度聽橫經
郡

來椽揮筆男邦及發硯賢郎專行狀不朽慎鑒銘

代石養蒙挽周醫教

達豈為良相君今達以醫祖宗興自我杭欽迭為師二
豎逃無處三皇祀有基蒙成并盛德誰不涕漣洏

寄吳子靜

君家吳季子炳炳著麟經繼世誇眉白持身尚鬢青字
能齊逸少才更婉玄齡翰苑揮椽筆垂紳步帝庭

羨子西造朝陽樓

氣勢薄蒼穹樓高百尺雄屏維山聳翠鉦掛日升紅真
可卧餘子端如見乃翁胸中梓人傳相業在胸中

汪氏雲林堂

雲林朝市遠恐負一生豪不仕疑無義隱居何自高作
霖膚寸合構厦斧斤操科第湖州始超宗紹鳳毛

芸儲

芸壁書魚蠹為防魚蠹書須將雙眼看匪直萬籤儲磊
落腹能載昏迷心悟除金根猶恐悞負訓惜居諸

用韻贈別隆興劉君

眉宇挾翠氣西山簾轉晴未嘗前日識似有故人情醇
比周瑜酒和如傅說羹相逢遽相別去去太忙生

賀金桐岡生日

七十古稀有公今尚一年君心安以樂家政老而傳隱
逸雖三逕恩封自九天勲名付蘭砌閒適壽綿延

挽李高甫

祁門浮溪人

李愿隱盤谷古今名並垂箴能規冢嗣贊自許男兒兩

世壽高甚八旬年近之外山埋玉處執紼總漣沔

又

庚癸濟民餒豈求榮子身大朝交止信初命報行仁咬
菜戒持已思尊尼省親詎知成永訣哀慟徹穹旻

又

李愿盤旋處名微隱更張大才真濟世小用僅征商救
絀富公弼息爭王彥方遺言遵古禮踰月即謀藏

五言排律

經訓乃菑畲

試題

學用菑畲比精由粗乃成譬諸農父事訓以聖人經習
戒成紛白披母舍殺青情田加種耨性地即郊垌倘匪
道耕熟翻慚畝稷馨金根校讐誤詩禮愧趨庭

賀戴庭芳誕男

譙國家祥應充問消息真掌圓珠的歷頭峙玉嶙峋肇
始中元節真元會合辰鳳儀先驚驚駒駿必麒麟九畹
芽初茁一枝芳正新乾成來豈偶震索積方臻祖德潤

彌浩孫謀蟄更詵他年重坐席有日搢傳紳親為含哺
悅賓沾分果均此郎騰踏早郎罷尚青春

挽郡城周醫教

姓與平原共相良醫亦良少嘗宗孔孟長始世岐黃救
命光宗祖仁心起瘵疴杏林何足擬淳意足相方神效
誰能企陰功詎可量帥連居兩郡殿首祀三皇復戶為
人計論堂傾已藏校官成赤立道貌想清揚創始君無
靳蒙成後敢忘德高天必鑒位下我何傷竹野自標雅

棟華相並香頃田今友愛斗粟古慚惶何啻千人活行
看五世昌蒙莊埋玉處送者淚應滂

七言律

次金滄洲病中九日韻

丙辰

縱不龍山孟萬年合如陶令醉籬邊雖云物物皆詩料
誰解時時與酒錢我輩白頭多間濶菊花青藥劣芳鮮
喜公勿藥將簪盞同泛金英倒玉船

次滄洲喜替弓手韻

塵土弓刀未是癡紛紛刻木久難欺王恂時復揮椽筆
樊噲從渠飲斗卮絕異一兵新解甲併祛二豎好舒眉
出羣老鶴雲天濶啖蔗光陰日日詩

汪靜軒木假山

嘉祐集中知木山蛾眉盤屈小烟鬟三峰想墮虛無裏
一記長流宇宙間巒岫遊魚今突兀豪酋蟲蟻久躋攀
老泉坡穎皆人傑古意蕭蕭力挽還

擬呈張郡守

中原文獻接前脩毓粹鍾和自鄆州金馬玉堂真學士
花屏練帶古諸侯近為姑孰規模在遠紹曲江功業優
宰相青氍毹可復徽民有幸且淹留

與黟尉王長卿

名元

少府河汾夫子後小桃源裏日吟詩錦囊儘富句皆好
綵棒雖懸威不施平易近民民父母謙恭待士士宗師
體仁未展長人志庭滿槐陰會有時

與黟簿楊雲海

蜀珍從昔重乾坤三鱣家聲尚可言朱墨勾稽今弛擔
紫清凌邈即騰軒眉山焦木秀重萃黟邑甘棠恩永存
鄰壤書生辱多問何當一見以文論

奉答齋諭先生

俄驚耳順過三年顧後瞻前愧昔賢自笑說鈴辭枉費
誰云經笥腹空便歸鄉漸慨交朋少為客焉依行輩先
多謝新詩過期待悠悠歲月漫推遷

次劉知事和荀廉訪見寄詩韻

知事名德溫

斯人磊砢更英多，廉善廉能志若何。
劍氣懾姦鋤故態，丹心救世起沈疴。
且添集上詩千首，不愛車前印幾窠。
凜凜道將風烈在，真如清濟貫黃河。

賀金子西誕第二子

十一月十三日

天知欲益讀書子，第二雛今得得來。
家世孝忠為命脉，扶輿清淑所胚胎。
存心耕雨一犁地，積德凌雲百尺臺。
三日食牛氣如許，貂蟬當復映公台。

和竹山月臺韻

我今想像賦高臺超出塵寰亦快哉人物風前臨玉樹
朋儕月下倒金罍但疑夜種白榆少豈必秋延丹桂來
斟酌嫦娥四時好眠遲何惜與徘徊

次韻贈王竹庚

竹庚精青鳥之學

天地儘寬行路難何如不出戶庭間家雖棲鳳多栽竹
身却尋龍飽看山到處為賓省造次數竿誰主自蕭閒
青囊囊取青蚨去歸翫穿苔虎豹斑

上鄧善芝提學

仲華不遇劉文叔所志願為芹藻師苗裔今提江浙學
風霜待相聖明時萬家夜月燈俱炯滿座春風物自熙
教雨行將濡霖雨召歸當軸未應遲

仲華鄧禹也

上焦總管

崇蔭前曾比武林馮熊展布蔭逾深東坡通守無為守
黃霸初臨喜再臨豈但州麾持皂蓋會當鼎鉉鑄黃金
孰先一郡後天下卷起西湖大作霖

上倪杭教

湖州人

湖學生平蘊蓄奇聲馳杭汴據臯比定知遍受諸公賞
豈但專為儒者師洙泗淵源歸誦課湖山景物入歌詩
家聲善論中和極歸贊明時封禪儀

上浙西道廉訪使

去天萬里遠乘驄寄命司存肅政中廉吏清污湛秋月
訪民疾苦盜春風鎮浮德與吳山重鑒試明還浙水同
攬轡何須外庸記秉鈞終屬黑頭公

和王宏翁韻二首

似山子

傳家有子端不死恍惚王充疑再生君擅詩聲如伯起
我慳飲量似公榮相逢客裏自多感各在貧中更愴情
王桀陳琳如可作歲寒冰雪眼雙明

又

馬異盧同孰異同年雖逾壯似成翁芙蓉尚喜不朝日
松柏何嫌經朔風網掣珊瑚滄海底篙撐舴艋急流中
吾言雖直不無意何惜乘時急用工

次汪梅隱府判退休言懷

并序

士大夫仕而能致高矣七十而不得謝雖賜之几杖
以安之然不得遂其高於心未必安也年及而致仕
者循其禮不待年及而先焉者尤見其高今府判稱
隱汪公去七十尚七八襁能先告老且得遂焉上以
褒表其親下以成立提攜其孫若曾孫愚也傳其休
官言志五詩讀而高之而慕之遂僭繼其聲奉賀五
首

早歲先彈貢禹冠喜公早退謝身還三千水擊溟茫外

七十車懸感慨間自覺飲水纔冷淡如何啖蔗儘清閒
宣尼也發歸與嘆幸也詩書得定刪

又

公負文章錦繡心祇須蓮燭賜恩頻退歸期不慙先世
大用姑將付後人陶菊一籬存晚節傳梅二季俟陽春
文宜為誥席珍待蘊美浮溪代出綸

又

逸軌超然遠市塵畏愁回首幾悲忻形同鷓鴣不期合

頗異鷄鸞定自分對越心還昭若日舒徐迹似懶於雲
易陳九卦稱而隱額手公能尊所聞

又

無事出門適意行忘機安得遣鷗鷺笑渠挂笏看山色
容我扶筇聽水聲萬百八場惟日醉三千成刻幾春晴
不拘年及方辭祿試授歐公自細評

又

竹馬翩翩娛放翁美哉異代與同風一門四世福良實

萬戶千鍾事亦空人自風波鳧上下我能味道蜜邊中
玄孫得見無難者十載曾孫花炬紅

和程伯玉遊普陀韻

櫟兒時聞諸五城黃提幹公謂大丞相訥翁先生程
公事母至孝與黃公同肄業郡庠見其每日行朝供
之餘必一歸奉母未晡又至此說蘊諸胸中七十年
矣茲蒙季澄教諭逋示槐府伯玉程君謁普陀大士
為母祈禱一宗詩案知君訥齋從姪孫也孝行如此

無愧家風良用起敬因和韻奉寄

侍母何須羨洛濱
訥翁純孝世持循
普陀瞻望鄭花曉
東野符同寸草春
寶婺壽光寧有極
白虹玉德本無塵
海中仙果千年實
採獻知君已問津

晉汝南王亮兄弟三人侍母伏太妃夜襖洛濱並持節鼓吹一時榮之東坡詩洛濱侍從三人貴京兆平反一笑看山簪花即鄭花觀音宴坐處有此大樹花見山谷山簪花詩註

題歙人程叔固字說後

乃槐堂丞相吉國公曾孫

騷人橘頌說曾枝
相國曾枝有此奇
固守一貞能用易

頌兼四始必興詩滔滔桃浪春還透鬱鬱槐陰晝尚遲
志學有常致而力丙辰衣鉢竟傳誰

戴廷芳立尊人南山公碑用高四叔祖韻

一生不被北山移隱德俱登羨道碑揮染筆鋒推逸少
雕鏤文采羨公垂孝誠永永終身慕盛美彰彰百世知
既固既安尤利後必然何待問著龜

送畢永仲遊姑蘓省親兼訪虛谷

永翁冰蘖仕蘇州玉潤今茲省侍遊綠浪紅欄多勝槩

清風明月一扁舟在家雖好閒非計行路良難謹自謀
須念椿萱頻偻指歸期莫待近新秋

又

四海九州虛谷老見之不用覓階梯父書呈徹能求教
世契敦崇定指迷非過南京叅待制是圖北斗仰昌黎
片言隻字如相贈歸袖光芒萬丈霓

賀汪稱隱壽藏五首

少壯幾時俄已翁速如馬耳射春風槐庭縱極三公貴

萬里終歸一穴同生也有涯那免盡死而不朽豈真空
地行仙舍公誰是只合衣冠貯此中

又

自述公真善自知我生觀處孰觀頤耆英初過馬君實
銘筆早逢王獻之

王仲儀為作
生前誌銘

着脚家山真覺穩回頭

宦路始經危先時不利後人好永宅脩期畢自為

又

栩栩蘧蘧夢不驚退藏於密漫經行

壽藏名
退密菴

歸來松栢

非無徑仙去芙蓉豈有城九卦三陳深易學萬家千戶
擅詩聲誰能得與公家似五世文庭震遠聲

又 以下二首借韻自述

也知難久愛吾廬自卜生墳去歲初五患但遵程子戒
一毫不泥郭君書桐棺似趙貧非病石槨如桓密反疎
死後不忘方是壽太虛如室了空虛

又

自笑那能免罰觥古稀過此竟無成此君辱與偃松友

太白尚分殘月明
客燕尋巢嗟寄託
老蠶作繭自經營
率然未覺摧顏甚
青眼猶因綠醕橫

呈鄧匪石

名文原字善之庚申年五月分司自黔過婺源屢問賦跡于子西因同迂

于溪口
柯邨渡

庶車兩度過山城
攬轡澄清素志行
學道愛人春袂北
詰姦刑暴月分明
貔貅斂戢知嚴律
雞犬安恬免震驚
甘雨隨車契天意
政聲休洽聽歌聲

黃秋江母有孝節門之錫命贈之詩者盈軸索

子賦一首

稱未亡人六十年恩光褒表節通天栢舟堅苦母心遂
蘭膳甘飴兒志專九鼎名端由相重一絲風不被官纏
事關倫紀非他比宜入新安郡乘編

丁未元旦試筆

雨當元日奈何天甲子欣欣兩日前五十六翁成老境
百千萬輩望豐年癡緒竹簡心皇惑饑搗薇根生接連
我不自憐尚憐彼燈花如笑恰為然

辛亥元日

分歲杯醺已遣愁，鷄聲呼起攬衣裘。
椿年浪說八千永，花甲今逢六十周。
白首惜春猶冉冉，朱顏慙日恐悠悠。
曰者指使將誰使，愁亦徒愁一笑休。

和東松菴岳王遺像詩韻

朱仙鎮上據全兵，萬里中原不足平。
棘寺銜冤真枉死，松菴遺像尚如生。
中興四將尤芳烈，大節千秋擅令名。
可恨張循阿老檣，却令同傳玷忠貞。

賀張圮齋得第四孫

并序

昔徐卿二雛少陵歌之穎濱第四孫東坡詩之今者
恭審祖德深培孫枝又長在令嗣則為徐卿之第二
子在先生則為穎濱之第四孫森森蘭玉衮衮公侯
良深健美賦詩為賀聊寫私忱

充閭瑞氣鬱葱葱蘭玉孫珠現掌中第四孫今似蘓子
無雙譽定姁黃童編傳圮上家聲遠網舉儒流祖德豐
復泰臨餘陽用壯棟隆遠照曲江公

次光姪詩韻

誤子窮途計已疎擇棲所恨匪岡梧
酉申乞捨傳書鴈
庚癸呼馳汗血駒
儒術謀身慚杜甫
老農請學合樊須
細思金亦何勞躍
陶鑄從諸天地爐

次葉郎賀張仲白壽藏詩韻

應笑姚崇憂墓碑
生前枉費計謀私
何如只付青烏記
未到同藏黃石時
借箸待將陳八難
羨輪直可頌三斯
內敬外歷多餘暇
安樂行窩儘賦詩

賀仲白兩旬得兩曾孫

用葉郎韻

橘頌孫枝慶疊重河清盛事有誰同
客來且伴竹為馬母教期吞膽用熊連
覲太翁兩旬內會呼高祖廿年中
壽過一百公家事前有張蒼後有公

次唐長孺兄見寄詩韻

海外馳神大九州何如弭節且椒丘
非熊尚父晚猶達射虎將軍竟不侯
朋友倫中交有信山川阻處鬱相繆

硯銘世擅筆鋒銳秋試朱衣定點頭

唐子西有硯銘

又

世路風波不足驚
山林深密適吟情
十洲三島果安在
一聖九賢能再生
夜月明眸思菊枕
春風轉盼卧桃笙
蟾宮有路君當往
筆陣縱橫在此行

次鄧善之五月菊花詩韻

俗呼滴滴金

窓前來伴蹙巾榴
滴滴圓黃點徑幽
不待臂萸添醉興
且隨腰艾動騷愁
金明難辦一朝費
花早看成五月秋
泥露掇英真菊石
名同實匪暫淹留

吳錫為程醉經求和孝隱堂詩

廬墓從來闢大倫人心萬古理常新
隱餘夫豈更求顯孝外元非別有仁
天地範圍大郭郭雲烟環遶近比隣
須知心醉六經士不是尋常橫目人

次韻祈雨

相公湖上老詩仙一語纔聞便格天
霖霖已蒙千畝雨霏微方裊一爐烟
潛憑象教小乘力好紀麟經大有年
田野歡聲入酌唱周詩直見夢魚篇

雨數日不止又用前韻

莫是陽臺行雨仙未知民以食為天半篙碧已添清漲
全幅練宜拖霽烟稻總低頭收有日未如生耳恐無年
憑誰為我箋天闕喜雨詩成苦雨篇

賀陳竹牖生孫

與令嗣月日時同

幾日名駒產有嬌中秋圓鏡始蛾眉清鍾桂子初三月
秀挺桐孫第一枝舉世淡然如嚼蠟於家樂甚自含飴
魯莊生與父同日不似今同日與時

木犀珠

岩樹初開金粟明
纍纍如貫耀人睛
非生蚌殼圓還皎
若比龍涎馥更清
分種元從天上落
粉身今捻掌中輕
莫言合浦光常在
敝袖歸懷夙有情

寄黟邑胡伯翔

應薦

小桃源本是仙宮
先輩風流想像中
文富固將儀瑞鳳
詩窮那肯弔寒蟲
半巖烟雨梅花落
一夜陂塘春水雄
若問近來成底事
箋詩註易夜燈紅

次黟舒君濱韻

久悟文章為小技聊於詩律辨寬嚴
巧思信幹無中有至味須知淡處甜
練帶索雲千里濶筆鋒抽月一同尖
何時得着黟峯屐桐火松窗雨半檐

呈徐學錄茂林

玉山人與徐教同姓不同族

紫陽里得兩徐侯分據臯比共細籌
古歛書生宗北斗上饒高士冠南州
象山要旨期叅攷鷲寺遺言願講求
老幹將收作樛棟茂林豈但竹君脩

次吳正夫賀余中鄉試韻 二首

聖代崇文科目興，鳶魚飛躍一機新。
梗楠喜得賢能士，樗櫟何須老病人。
天地正交雖遇泰，舟車所至未逢春。
仕途廣濶無能往，畢世甘為草莽臣。

又

同志同經辱與遊，迂疎未到學而優。
敢言才過千人俊，安得詩輕萬戶侯。
我似北溪老漳郡，君如李子重延州。
年當六十二，云遲暮縱使為公匪黑頭。

和愛山叔端午韻

方喜槐庭日影移蕭蕭雨忽濕柴扉略傾蒲酒滋顏面
急倒蘭湯浴瘦肥湘水恨長騷尚在綵符髮短鬢難圍
竹林安得頻相聚坐對南山晚未歸

金子西新創朝陽樓

三首

忽構巍樓甲第傍知公報本意難忘無邊秋色千巖列
不斷溪聲萬壑長面面玲瓏宜夜月心心精爽在朝陽
有時慨嘆憑欄久如見前人舊草堂

又

高敞崇樓面勢宏遙瞻東日上蓬瀛故人把袂春如海
野客論詩墨作城幔捲山光飛瀑布樽開檻外聽新鶯
脩桐曾見陰逾密過者皆興仰止情

子西尊人
號桐岡

又

朝陽高額聳觀瞻登此樓臺意欲仙一面虛明先受日
三層兀突欲攙天從渠餘子卧其下常若乃翁瞻在前
東望扶桑如咫尺藥欄花嶼自年年

寄廻嶺汪景周參軍

龍魚芳裔閱千年奕世生賢豈偶然
景慕姬公勤握髮
遭逢漢武侍祥筵
春風桃李門牆麗
晚節松篁籬壁堅
疎略如予稀見面
幾時重叩五雲邊

答張叔黎

笑談直欲覓封侯
投我新詩湛似秋
不向夢中仍說夢
當于樓上更安樓
學精要法斯文孔
道妙須參太極周
雲影天光涵映處
方塘活水看源頭

題洪氏西園隱微館 并引

洪君昭父袖詩過予謂其家有隱微之館旁闢西園
好事者多詩之余謂隱微之義實本於中庸莫見莫
顯之旨何詩之者之不一言也昔君家文安公以小
隱自命彼不過謂得山林趣耳自君隱微之旨視之
盖有得於聖門之理趣文安又讓一頭地矣敬演此
義當必有印可之者

隱微之義自淵然標揭中庸在目前更闢西園供獨樂

肯隨北里漫爭妍
窺人新綠深深隱
背澗殘花朵朵眠
小隱君當超祖躅
鳶魚飛躍揔由天

出處

出處行藏豈偶然
機緣盡處自應遷
浮屠桑下無三宿
博士蓬邊偶四年
外物未須多悵恨
中局幸已略流傳
一時不得如吾願
久遠相看不愧天

次韻儒戶蠲徭

蠲徭征墨幾番新
實慮陵夸賦子衿
聖學相傳千載遠

君恩不隔萬山深
蠹魚文字誰勤閱
野馬塵埃日暗侵
好是自鞭勉
其實不然何以服人心
和成此詩無帝可
寫姑以此藥與仲
文甥一觀但後一截雖吾儕自勉之言恐
或者不察人不樂聞不必轉以示人也

吳執敬生曾孫

應午

盛事喧傳閭里中
古墩佳氣鬱葱葱
一門四代孫生子
萬口詞同誰似公
曾又復玄身易見仁
而能壽道無窮
客來莫訝出迎懶
竹馬駸駸伴放翁

次程鍾山所寄詩二首

淳所

雖濶鷗盟蝶夢通不然何以見心同故人有感舊時雨
後學因觀前輩風安得一團和氣老共浮百斛酒船中
顧公書勸歸來看鬱鬱無云只欲東

又

詩無斧鑿竟通仙慣閱興亡休問天文字藏山河注海
功名蓋世泰炊烟大槐為國徒成夢短策看花屢易年
我欲携琴孤棹訪堦前書帶已芊芊

易巾偶與子靜同日同樣同價戲成一首

與君同日換烏紗愧我頭童髮并華難復脫來頻漉酒
祇宜籠去自煎茶側時嘗得詩中味散矣曾如足上靴
貧不儉期頗類儉屢將墊角漫相誇

再用易巾韻

隨處聊憑製漆紗豈其官樣必京華竹皮最古今苴履
椰子稱奇亦貯茶

椰子可為冠亦可為茶瓶見山谷詩

禿髮已知頭似筆

笑顏底用面如靴小冠子夏時方尚髮葉凌雲敢自誇

三用易巾韻

縑布如今儉用紗比升三十此非華尚玄何惜頻拖拂
滌白須防自磴茶存古鮮能端與甫趨時誰不笠和靴
誤身儂已悔無及破帽多情莫漫誇

四用易巾韻

人情反覆薄如紗終歲清愁鬢欲華先苦半生真食蓼
回甘晚景異嘗茶無錢歲僅易新帽有線冬猶補破靴
如此兩窮詩作崇尚拈句字向人誇

五用易巾韻

月移梅影上窗紗
恰讀新篇對月華
和似鶯黃盈盎酒
清於兔褐半甌茶
金身漫說蓮生座
汗脚何妨霜滿靴
選佛選官俱是幻
詩名不朽待人誇

次子靜九日韻

良辰何事故遲留
知我臨風遠想不
黃菊傲人籬一帶
紅萸入琖酒千籌
衣裳暮染山雲白
樓閣朝開客路秋
俛仰之間尚陳迹
今年宜不去年俦

九日見流民又次子靜韻

節日登高眺八方奈何蒿目竟荒荒觀渠蟻國民頻徙
感我牛山淚數行樂土可依宜嚮慕愁城無計轉悽傷
黃花似有撩人意一笑相携入醉鄉

呈曹弘齋

戊戌秋丁參陪入城別後寄之

龐公元自入城希陪祀芹宮禮不違虛設肩輿惟拄杖
懶持手版只深衣前朝進士見高躅南極老人瞻遠輝
亦步亦趨我何幸飽聆清論透精微

答樵陽地理熊心泉

處仁

只道尋龍解識真豈知詩亦盡驚人胸無塵俗方名世
心有淵泉可潤身相地眼高江月午穿天句好野花春
景純以外誰兼此五字遊仙萬古新

用前韻答婺源許屏山

士元

未識蒼屏面目真名章先肯寄塵人長吟月琢風追句
想見泉流山立身蛟劍一揮那復怪花瓢常在永如春
神仙孫子非凡骨尤喜詩成字字新

次月卿姪韻三首

族祖當年負大名如今願子振家聲語非泣鬼未為險
義必入神方見精三徑梧桐雲影翠一池荇藻夜痕清
著書不少前賢樂高閣研朱字字評

又

鴈挾清風送子詩政當籬底採花時見山安得如彭澤
迷道方將問具茨更篤先賢前聖學求為幼婦外孫辭
數聲漁唱斜陽外定有人來說項斯

又

萬樹松篁繞屋長喜君座上墨花香夜鐘獨釣溪頭月
曉雨親耕圃外桑歷落詩篇秋更健紛披菊瓣老仍黃
年來異地悲萍梗何日相攜返故岡

賀毅所生男

壬辰九月十日

六十年當天運復祖孫恰遇兩壬辰只今有子萬事足
喜與當時一第均壽菊正花香未晚蟠桃遲實景常春
此人的是逢辰者曾祖青檀付此人

次韻吳義夫營壽藏

有引

義夫吳君預卜壽藏於先隴之旁不問陰陽拘忌賦
詩以祛諸郎之惑徵和於吾甥仲文仲文轉以示予
余謂墓書之惑人深矣吾儕之勘破易欲兒曹之不
惑難陰陽拘忌自固不問然未藏之前或既藏之後
子孫惑於浮言其若之何此等皆非人力之所能為
惟有面見先人於地下留方寸地遺子孫耕於身後
以天感天使其自不至於此可也載賡一章以當請
益高明其可之否乎

壘室預謀身後居誰能終始愛吾廬深長覺世伊川說
奇怪迷人郭氏書得覲先顏斯已足但留寸地便堪畬
何拘白虎青龍說走徧雲山問故墟

題望遠樓

江天樓閣列遙山雲物相期日往還心遠本超雙目外
身高聊寄一欄間王孫芳草當前出遊子花驄到處閒
欲送飛鴻忘久竚從來俗慮盡行刪

園獵

昆蟲已是蟄藏時獵騎紛紛繞翠微勿謂火攻為下策
略同兵戰寓危機仁心誰去網三面殺氣似環城四圍
乾豆元來因報本充庖豈但愛鮮肥

寄題唐叔重敬養堂

名鉉歙人吏於休寧

菑畬經訓世其門肅公家幾葉孫駿驥寧辭聖路遠
靈犀肯受史塵昏代耕雖鮮官中祿敬養自怡堂上尊
戴記肯哉思弗辱守身慎重過璵璠

七言絕句

贈項松山

嚴州人精地理

嚴陵風物壓山陰
晦老遺言尚可尋
最喜一翻新雨後
山南山北在君心

又

久客天涯不計年
青烏妙術自仙傳
景純去後唯君繼
滿室松風奏管絃

送梅岩浙游二首

誰識梅花岩下人
香中堅坐十年春
如今一出緣何決

瘦影橫斜致自新

又

吾道難行且試行
感今弔古眼雙明
乘閒一訪孤山老
印我寒香半點清

九月十八日立冬是夜大雷電繼以風雨

今日玄冥行
令新轟雷掣電駭人心
天公想做開爐節
電是火光雷鼓音

促織

翠羽迎風清夜幽
催人機杼替人愁
聲聲恤緯有深意
我唱新詩不勝秋

晚蟬

秋早梧桐颭晚風
鳴蟬無數樹陰中
斜陽似假渠聲勢
只是斜陽不久紅

秋後蠅

夏日營營遶案飛
秋來引類欲何為
從教羣集秋瓜上
落蒂秋瓜能幾時

贈臨溪程玄玄子

名道真

同邑玄玄子程君精專修鍊兼善丹青伊川詩曰我
亦有丹君信否用時還可壽斯民此君之家學也君
但留意於伊川所有之丹而可矣二十八字用寫此
意

妙門深入造玄玄遊戲丹青不足言吾道真丹紹程子
遇時端可壽元元

庚午歲七月讀離卦有感

日昃惟當鼓缶歌餘年不樂更如何時行則行止斯止
隨處無非安樂窩

屢有傳予死者戲拈二首

可笑人頻傳我死其如天自永吾生惟無可用故能壽
豈苟然哉樂字名

又

生也有涯終氣散死而不朽此心傳豈真無用大有用
羽翼聖經或勉旃

壽汪盤隱

又號竹逸戊午四月二十九日

首夏清和六月暘冀留一莢喜稱觴延長氣象為公祝
化日方長壽更長

又

竹溪六逸是前身固蒂深根保性真我謂大椿如竹茂
八十歲月益蓁蓁

又

樓標盤隱在花叢天矯千松盡作龍一派濤聲鱗鬣動

此君真箇有仙風

又

桃花千尺有汪倫
李白相逢意最親
今日竹間高逸在
十洲三島屬斯人

壽惠山

壬戌四月十二日

金佛浴來先四日
玉蟾圓處後三宵
此為岳降生申旦
鶴露添杯喜氣饒

又

清和時景有將半五福箕疇祝更全燕子日長方進進
腫方髻綠不知年

青子亭

植梅為亭故名以下二首為悠山宗人作

標實和羹今鮮知爭吟水影月香詩似梅人既公家有
會見成陰子滿枝

長春亭

植月季為亭故名

奇葩滿架月盈盈不是臘脂態自輕寄語亭中讀書客
春光如許好聞鶯

詩餘

浣溪沙

壽汪盤隱

盤隱誰云必太行
神交李愿躡遺芳
今朝南極一星光
野處襟期尤順適
退藏滋味更悠長
歌中元說壽而康

清平樂

寄惠山士成四月十二日

惠山蒼翠遠與毗陵嬾
彼處錫泉標第二
此更鍾奇毓異
年年初度浮觴醉餘新淪
茶香山水濡雪乳淡

中滋味悠長

又壽彬齋四月二十八日

清和天氣三莢莫猶翠恰喜先生初度至近迂薰絲佳
致幾年人物彬彬文華質實惟均壽宿臨之在上龍
溪文脉常新

西江月

寄汪梅菴御史

御史乘驄剛直廡車攬轡澄清先聲應播五羊城一道
凜然尊敬 菴外疎花破玉枝頭佳實調羹催歸不入

東釣衡豈但動公詩興

玉樓春

和金滄洲

新篁搖翠添波綠
粧點瑞溪深
一曲青衫司馬緩來遊
卜夜清歡孤繼燭
江心挑杖聊開束
更好着鞭馳駿
足樽前頗有遏雲聲
劣可纖纖扶藥玉

又

庭槐鬱鬱雲屯綠
新霽彩移階砌曲
麗詞入手可絃歌
想是咄嗟成刻燭
牙籤高閣應難束
黃妳有時誇睡

足覺來課讀愛諸孫他日登金仍步玉

臨江仙

次月卿賀生日韻

吾族英才常接迹年來似曉星
稀子言秀逸未嘗卮老夫拍案起
不覺漸舒眉青佩次孫欣得與樊川
小姪名宜香分甲午月宮枝各當傳
祖鉢教養願觀頤

時奇孫從

學于月卿

滿江紅

賀金子西生日十一月初十日

乾鵲鳴簷殷勤報主人生旦端巧遇迎長添線的堪稱

讚律轉一陽葭已動復來七日梅初綻符義經數迂新
棋綿高筭 萱春永斑衣絢蘭房煥琴聲衍益一門和
氣流霞深泛世濟忠貞貂珥七年登強仕鵬程萬正小
春佳候敵神仙閒遊翫

滿庭芳

送陳德翁

標格冲夸聲名洋溢德人泰宇春融一團和氣還與伯
淳同成就燈窗弟子今陞擢論鑄顏功彈冠興依稀貢
禹應聘教王宮 公家梅潤老臯比戚畹聲振江東矧

詵詵胃子得坐春風自此先生升矣班玉笋文補山龍
充德量薰陶宇宙和氣一團中

水調歌頭

賀汪覺翁受吉水州判

殿閣微涼迴吹到勅書新定知盤谷深處草木煥精神
帝念水紋成吉合得卷阿吉士州政佐經綸婉婉幕中
畫行矣細數陳除書至喜氣溢列朝紳志伊所志將
以斯道覺斯民家有青氈釣軸振武接芳塵自秉浮溪
筆畫錦記逢辰

水調歌頭

壽金滄洲

天遣東萊呂丁巳瑞南州稅侯芳裔如此生歲嬾前脩
僂指六旬踰一過眼流光兩世花甲又從頭浩氣塞天
地吾道付滄洲日未暮宴初列九霞流齊眉偕老如
願桂子播芳猷孫稟箕張雙宿祖付詩書千卷此外復
何求但願延椿算燕翼更貽謀

金菊對芙蓉

壽金桐岡九月二十五日

壽宿騰光壽香裊碧鬱葱枝上梧桐記紱麟令旦門掛

孤蓬今年東閣郎皆侍懷章綬拜捧金鍾榮華富貴眼
前誰似堪展眉峰 秋高景物俱濃正堦前金菊巧對

芙蓉愛菊名壽客壽與公同醉蓉初瑩凝脂面酣天酒
芳臉潮紅何妨判飲與花雙醉醉似花容

金氏園有
醉芙蓉

滿庭芳

壽縣判梧山先生

樓指中秋齊頭十日後庚玉兔初弦當年此際天恰生
賢自旦駸駸至望清味永翻勝規圓高掛在碧梧山上
清絕綠生烟 懷中梧月炤天知心事銖視貂蟬綵衣

無價寶樂自無邊此去古稀近也長生錄世世相傳慈
萱側金盃滿泛梧月吸年年

滿江紅

送朱姓吏滿歸

只說琳川精吏道恢恢餘地元來是深衣儒者將儒飾
吏傳世四書端實學待人一縣皆和氣及芳辰解賦歸
來真堪醉肩已息心無愧青鬢在蒼顏未符君家翁
子朱買臣年當貴九月終行驚退三千水擊搏鵬易豈
有材如此不超遷行知遇

水調歌頭

壽朱子章

七十古稀有今喜見先生紫陽家學淵奧場屋舊家聲
鶚薦西風早歲豹隱南山晚節天爵自尊榮桂子蘭孫
擁南極老人星杜陵老多酒債羨脩齡豈如壽富兼
得熊掌與魚并八十老翁為將九十武公為相不足為
公稱鶴算與同文道重貌公卿

沁園春

壽張起齋四月十一日

首夏清和望前三夕天現壽星恰先庚三日釋迦浴佛

後庚三日呂洞賓生慈佛神仙引前導後來作人間瑞
世英今耆艾久提綱諸道幾萬儒燈金甌行覆香名
天再遣留侯佐太平會榮封萬尺編符黃石筭綿千歲
經誦黃庭從赤松遊足知推尚好待他年功已成如今
且向壽星明處滿捧霞觥



定宇集卷十六